

Bosna i Hercegovina  
Federacija Bosne i Hercegovine  
Kanton Sarajevo  
JU Treća gimnazija  
Vijeće roditelja školske 2023/24. godine

Sarajevo, 23. 11. 2023. godine

## ZAPISNIK

### Druge redovne sjednice Vijeća roditelja

Druga redovna sjednica Vijeća roditelja održana je 23.11.2023. godine u školskoj biblioteci Treće gimnazije sa početkom u 18.00 sati.

Sjednici je prisustvovalo 20 članova Vijeća roditelja (od neophodnih 13 koliko iznosi kvorum neophodan za odlučivanje prema članu 16. Poslovnika o radu Vijeća roditelja). Odsutna su bila 4 člana Vijeća roditelja od kojih su 3 člana najavila svoj izostanak (g. Adnan Hajrulahović II2, gđa. Armina Puzić IV2 i g. Rifat Fetić IV3), a g. Nedžad Sudić su nenajavljeno odsustvovao. Umjesto gđe. Makside Ibrahimović (I4) došao je zamjenski član Vijeća roditelja tog odjeljenja g. Rizah Kabaši.

Sjednici Vijeća roditelja također su prisustvovali predstavnici škole JU Treća gimnazija i to direktorica škole gđa. Amra Čolić, zamjenica direktorice gđa. Meliha Salihović, psiholog gđa. Merima Pašalić i pedagog škole gđa. Hasija Dedović.

Dnevni red sjednice je dopunjen (od najavljenog je putem mail-a) pa je sadržavao sljedeće tačke:

1. Usvajanje Zapisnika sa Prve redovne sjednice Vijeća roditelja JU Treća gimnazija održane 27.09.2023. godine kao i Zapisnika Prve vanredne sjednice Vijeća roditelja JU Treća gimnazija održane 18.10.2023. godine,
2. Analiza uspjeha u učenju i vladanju na kraju prvog klasifikacionog perioda,
3. Informacija o primopredaji arhive Vijeća roditelja,
4. Razmatranje i usvajanje Plana i programa rada Vijeća roditelja za tekuću školsku 2023/2024. godinu,
5. Izbor dva predstavnika Vijeća roditelja u ocjenjivački žiri za Decembarske dane kulture,
6. Izbor dva člana Vijeća roditelja u Komisiju za izbor putničke agencije - najboljeg ponuđača za realizaciju maturalne ekskurzije za treće razrede u školskoj 2023/2024. godini,
7. Upoznavanje sa aktivnostima Koordinacije Novo Sarajevo VROŠŠ Kantona Sarajevo,
8. Tekuća pitanja:
  1. Saradnja Vijeća roditelja JU Treća gimnazija sa udruženjem „Alumni Treće gimnazije Sarajevo“ na realizaciji vannastavnih projekata i unapređenju odgojno-obrazovnog procesa škole,
  2. Inicijativa III3 odjeljenja Treće gimnazije za uvođenje online sedmice u školi tokom održavanja sportske manifestacije „Gimnazijada“,
  3. Inicijativa i upit III3 odjeljenja Treće gimnazije za organizacijom izleta i kraćih studijskih posjeta

#### 4. Razno

Izmijenjeni dnevni red je usvojen jednoglasno.

##### **Ad/1**

(Usvajanje Zapisnika sa Prve redovne sjednice Vijeća roditelja JU Treća gimnazija održane 27.09.2023. godine kao i Zapisnika Prve vanredne sjednice Vijeća roditelja JU Treća gimnazija održane 18.10.2023. godine)

Zapisnici (sa usaglašenim izmjenama) su prethodno dostavljeni članovima Vijeća roditelja kao pripremni materijal za Drugu redovnu sjednicu Vijeća roditelja, a na ovoj sjednici su usvojeni jednoglasno.

##### **Ad/2**

(Analiza uspjeha u učenju i vladanju na kraju prvog klasifikacionog perioda)

Analiza uspjeha u učenju i vladanju je u formi izvještaja putem mail-a već dostavljena članovima Vijeća roditelja kao pripremni materijal za sjednicu. U tom smislu je Vijeće roditelja primilo k znanju ove informacije.

##### **Ad/3**

(Informacija o primopredaji arhive Vijeća roditelja)

Pedagog škole gđa. Hasija Dedović sačinila je Zapisnik o primopredaji arhive Vijeća roditelja koji su potpisali predsjednica Vijeća roditelja gđa. Aida Aganović kao i zamjenik predsjednice Vijeća roditelja g. Tihomir Veselinović.

Gđa. Snježana Brkić (III3) je dala preporuku da se, pored pisanog, vrši i elektronsko pohranjivanje ove arhive radi, između ostalog, brzine pristupa podacima arhive.

Pedagog škole gđa. Hasija Dedović je konstatovala da već postoji elektronska forma ove arhive.

##### **Ad/4**

(Razmatranje i usvajanje Plana i programa rada Vijeća roditelja za tekuću školsku 2023/2024. godinu)

Plana i programa rada Vijeća roditelja za tekuću školsku 2023/2024. godinu dostavljen je članovima Vijeća roditelja, kao pripremni materijal za sjednicu, putem mail-a.

Gđa. Snježana Brkić (III3) je imala izvjesne preporuke izmjena Plana i programa rada Vijeća roditelja (koje je dostavila u pisanoj formi), između ostalog i to da se broj redovnih sjednica Vijeća roditelja reducira na 4 a ostale bi se mogle, po potrebi, održavati i kao vanredne. Smatra da Vijeće roditelja ne bi trebalo ovim planom sebi postavljati dinamiku koja ga potencijalno može opteretiti u smislu implementacije iste.

Vijeće roditelja je glasanjem, jednoglasno, prihvatilo ovaj prijedlog bazičnog održavanja 4 redovne sjednice Vijeća roditelja (jedna konstituirajuća i tri redovne sjednice) Planom i programom rada Vijeća roditelja.

U tom smislu će se izvršiti prepravka predloženog dokumenta Plana i programa rada Vijeća roditelja.

#### **Ad/5**

(Izbor dva predstavnika Vijeća roditelja u ocjenjivački žiri za Decembarske dane kulture)

Planirano je da se manifestacija „Decembarski dani kulture“ održi 28.12.2023. godine u vrijeme online sedmice kako bi se olakšao dolazak svim zainteresovanim.

Predstavnici Vijeća roditelja za ovu manifestaciju biće g. Izet Turković (za I i III razrede) i g. Tihomir Veselinović (za II i IV razrede).

Vijeće roditelja toplo preporučuje svim roditeljima učenika, kao i onima koji to nisu, prisustvo ovoj prelijepoj manifestaciji koja će biti organizovana u školi JU Treća gimnazija (28.12.2023.) u terminu koji će na vrijeme biti dostavljen.

#### **Ad/6**

(Izbor dva člana Vijeća roditelja u Komisiju za izbor putničke agencije - najboljeg ponuđača za realizaciju maturalne ekskurzije za treće razrede u školskoj 2023/2024. godini)

U Komisiju za izbor putničke agencije izabrani su članovi Vijeća roditelja iz reda odjeljenja trećih razreda i to gđa. Snježana Brkić (III3) i gđa. Almira Muhović (III5).

Treća gimnazija praktikuje da, iz razumljivih razloga sigurnosti učenika, razrednici odjeljenja obavezno idu na ekskurziju sa svojim odjeljenjima ali i odabrani predstavnici škole. Destinaciju biraju učenici glasajući u svojim odjeljenjima.

#### **Ad/7**

(Upoznavanje sa aktivnostima Koordinacije Novo Sarajevo VROSŠ Kantona Sarajevo)

Predsjednica Vijeća roditelja gđa. Aida Aganović prisustvovala je sastanku ove Koordinacije gdje je, kako kaže, u fokusu diskusija bila, prije svega, sigurnost djece u osnovnim školama.

Razgovaralo se i o energetske napitcima i čipsu, potencijalno opasnim za djecu, koji su se pojavili u prodaji. Tema su bili i parkinzi za bicikle i romobile (kako ih omogućiti) što naša škola JU Treća gimnazija već ima.

#### **Ad/8**

(Tekuća pitanja)

1. Saradnja Vijeća roditelja JU Treća gimnazija sa udruženjem „Alumni Treće gimnazije Sarajevo“ na realizaciji vannastavnih projekata i unapređenju odgojno-obrazovnog procesa škole

Predsjednica Vijeća roditelja gđa. Aida Aganović obavjestila je prisutne članove Vijeća roditelja da je ispred Vijeća roditelja, sukladno zaključcima Prve vanredne sjednice Vijeća roditelja, potpisala najavljeni sporazum saradnje Vijeća roditelja JU Treća gimnazija sa udruženjem „Alumni Treće gimnazije Sarajevo“ te da će taj dokument biti dostavljen članovima Vijeća roditelja. Obavjestila je Vijeće roditelja da su zaključno sa 23.11.2023. ukupno 34 roditelja izvršila uplatu na dostavljeni račun Udruženja. Prema uvidu, uglavnom roditelji iz 15 odjeljenja su napravili ove uplate.

2. Inicijativa III3 odjeljenja Treće gimnazije za uvođenje online sedmice u školi tokom održavanja sportske manifestacije „Gimnazijada“

Gđa. Snježana Brkić (III3) je, u pisanom dokumentu, pojasnila da se tokom održavanja sportske manifestacije „Gimnazijada“ dešavaju problemi u vezi mogućnosti izostanka učenika (takmičara i navijača) sa nastave kao i situacije koje prate takve izostanke sa nastave. Smatraju u odjeljenju III3 da bi problem bio riješen uvođenjem online sjednice tokom odvijanja ovog takmičenja.

Vijeće roditelja je, bazično, podržalo ovu inicijativu u smislu svoje preporuke školi da, shodno mogućnostima, pokuša uklopiti termine online sedmice i sportske manifestacije „Gimnazijada“.

Direktorica škole gđa. Amra Čolić je objasnila da uvođenje online sedmice u terminu odvijanja sportske manifestacije „Gimnazijada“ nije jednostavno kako u organizacionom smislu tako i u smislu poštivanja zakonskih normi. Napomenula je da će, prema informacijama koje su u opticaju, dvije online sedmice u školskom polugodištu (novim propisima Ministarstva za odgoj i obrazovanje Kantona Sarajevo) biti reducirane na jednu online sedmicu. Obzirom na nepoznanice koje mogu pratiti termin odvijanja sportske manifestacije „Gimnazijada“ i na instrukcije Ministarstva u pogledu online sedmice (koje su zakonske i koje škola mora slijediti) smatra da škola može pokušati ali ni u kom slučaju ne može garantovati usklađivanje termina jednog i drugog.

Također je spomenula da je JU Treća gimnazija već prihvatila organizaciju projekta „Kamp matematike“ koji također nastoji uklopiti sa terminom online sedmice.

Pedagog škole gđa. Hasija Dedović je naglasila da škola redovno daje preporuke svom nastavnom kadru u smislu sugestija za razumjevanje vannastavnih aktivnosti, ali i to da nastavnici imaju kalendar aktivnosti i obaveza (npr. broj ocjena koje se moraju dodijeliti na kraju jednog klasifikacionog perioda) koji, sukladno zakonu, moraju poštivati te da se javlja problem da učenici (nakon takvih manifestacija ili studijskih posjeta) nisu baš promptno spremni za ocjenjivanje i da trebaju period akomodacije.

Gđa. Almira Muhović (III5) je, u smislu prethodno navedenog, pohvalila susretljivost profesora fizike g. Mevludina Maličevića koji je pokazao razumjevanje prema učenicima u smislu njihovog odsustva i učešća na „Gimnazijadi“ i koji je izvjesno prilagodio njihove obaveze u školi shodno tome.

3. Inicijativa i upit III3 odjeljenja Treće gimnazije za organizacijom izleta i kraćih studijskih posjeta

Gđa. Snježana Brkić (III3) je u pisanom dokumentu prosljedila inicijativu i upit svog odjeljenja školi JU Treća gimnazija vezano za organizovanje izleta i kraćih studijskih posjeta učenika od strane škole. Stiče se utisak, konstatuju, da Treća gimnazija ima manje izleta i studijskih posjeta svojih učenika u odnosu na druge škole, odnosno da odjeljenje III3 putuje manje od drugih odjeljenja svoje škole. Konfuzne su, također navode, informacije o instrukcijama nadležnog ministarstva po ovom pitanju, jer po njima, očigledno, neke škole putuju više od drugih. Zanima ih kako roditelji učenika mogu afirmativno djelovati po ovom pitanju jer pomenute aktivnosti, navode, imaju višestruke benefite za učenike.

Direktorica škole gđa. Amra Čolić je pojasnila da postoje pravilnici nadležnog ministarstva koji tretiraju ovu oblast i da u tom smislu postoji definisan redosljed koraka koje škola treba napraviti kao i određena ograničenja. Navodi da svaka studijska posjeta (ili izlet) učenika mora biti u okvirima zakona a to znači, između ostalog, da mora biti unaprijed predviđena Godišnjim programom rada škole (GPR) što uključuje niz aktivnosti od formiranja odgovarajućih komisija (u kojima trebaju participirati i roditelji učenika), odluka Nastavničkog vijeća, izdavanja putnih naloga pa sve do konkretnih plaćanja osoblja škole koje realizuje posjetu. Ne možete, objašnjava, zadužiti osoblje škole (izdvojenim vremenom i odgovornošću) određenom studijskom posjetom (na par dana) tek tako i bez ikakve finansijske naknade.

(U tom smislu je preporuka Vijeća roditelja roditeljima škole za finansijskom potporom vannastavnih aktivnosti i projekata škole putem udruženja „Alumni Treće gimnazije Sarajevo“, ali su se do 23.11.2023. godine samo 34 roditelja odazvala ovom pozivu - opaska zapisničara.)

Direktorica škole gđa. Amra Čolić također je informisala Vijeće roditelja da Treća gimnazija ima priličan broj izleta i studijskih posjeta, po čemu je između ostalog i prepoznatljiva, te da odjeljenje III3 je ima isti tretman kao i ostala odjeljenja trećih razreda.

Pojasnila je da se JU Treća gimnazija pridržava zakonskog okvira po ovom pitanju i da potencira sigurnost učenika na takvim putovanjima jer se mnoge škole, smatra, svojim postupanjem (koje je zakonski upitno) zapravo neodgovorno ponašaju prema svojim učenicima. Rekla je da će, svakako, izvršiti konsultacije sa razrednicima odjeljenja po

ovom pitanju radi, eventualnog, unosa onog za šta su učenici zainteresovani po ovom pitanju u GPR škole.

U kontekstu navedenog Vijeće roditelja afirmativno gleda na pomenutu inicijativu iako se nije formalno izjasnilo po pitanju iste.

#### 4. Razno

##### 4.1.

G. Mirza Hulusić (I5) se u ime svog odjeljenja obratio Vijeću roditelja za davanje podrške učenici iz njihovog odjeljenja, koja je u osnovnoj školi učila francuski jezik, u smislu apela Vijeća roditelja Trećoj gimnaziji da iznađe modus organizovanja nastave francuskog jezika za ovu učenicu pozicionirajući je u neko jezičko odjeljenje škole Treća gimnazija.

Vijeće roditelja je iskazalo podršku ovoj učenici apelirajući na školu JU Treća gimnazija da, u granicama svojih mogućnosti, pomogne ovoj učenici.

Direktorica škole gđa. Amra Čolić je obavjestila Vijeće roditelja da je škola JU Treća gimnazija već djelovala po ovom pitanju obrativši se upitom za postupanjem nadležnom Ministarstvu za odgoj i obrazovanje Kantona Sarajevo budući da škola, prema važećim zakonskim normama, ne može samoinicijativno organizovati nastavu iz određenog predmeta za jednog ili par učenika. U tom smislu će, pojasnila je, pomenutoj učenici biti omogućeno prebacivanje (za drugi razred srednjeg obrazovanja) u školu (gimnaziju) koja je u stanju organizovati nastavu francuskog jezika.

##### 4.2.

Gđa. Amra Škapur, predstavnik odjeljenja III4, obratila se Vijeću roditelja sa pritužbama svog odjeljenja na predmetnog nastavnika fizike (g. Maličevića) kao i na predmetnog nastavnika matematike (gđa. Maličević) konstatujući da je prethodno održani roditeljski sastanak ovog odjeljenja bio zaista mučan.

Navodi primjer testa iz fizike iz kojeg je 47% učenika ovog odjeljenja dobilo nedovoljnu ocjenu, tvrdi. Ogorčeni su i na ocjenu Odjeljenjskog vijeća škole (koje na njihove pritužbe konstatuje „da su se djeca pomalo uspavala“) napominjući da se radi o, iz prethodnih godina, boljem odjeljenju. Roditelji ovog odjeljenja, tvrdi, smatraju za ova dva predmetna nastavnika „da su preambiciozni“. Traže od uprave škole da izvrši uvid u testove koje oni daju učenicima kao i potporu pedagoga i psihologa škole djeci.

G. Mirza Terzo (IV6) konstatovao je, shodno svom iskustvu u Vijeću roditelja Treće gimnazije (a već je 8 godina njegov član), da su primjedbe odjeljenja III4 neprihvatljive. Pita se šta bi onda roditelji ovog odjeljenja rekli za prof. Sadika Omerovića (sada već penzionisanog profesora Treće gimnazije - opaska zapisničara) ako ovako govore o

profesoru Maličeviću. Roditelji ovog odjeljenja su se obratili Vijeću roditelja, objašnjava, bez da su prethodno slijedili Protokol komunikacije i saradnje roditelja sa školom (koji tretira i ovakve situacije) pa su njihove primjedbe prije svega preuranjene.

Gđa. Snježana Brkić (III3) je pojasnila da je Protokol komunikacije i saradnje roditelja sa školom svakako osnova koju treba slijediti, ali da, i pored toga, gđa. Škapur (III4), kao delegirani predstavnik svog odjeljenja, ima pravo iznositi primjedbe svog odjeljenja Vijeću roditelja i školi.

G. Izet Turković (IV5) je podsjetio da je odjeljenju koje predstavlja prošle školske godine (tada je to bilo odjeljenje III5) fiziku predavao prof. Maličević na kojeg su se učenici ovog razreda brzo navikli. Primjetio je da prof. Maličević voli da uradi više zadataka za određenu oblast fizike nego to učenici nekada očekuju što vidi jako pozitivnim jer uvježbavanje samo koristi učenicima koji žele naučiti i u tom smislu ga ne smatra „preambicioznim“. Ne smatra ga posebno strogim niti u ocjenjivanju niti u odnosu prema učenicima, jer mu je ovo odjeljenje na kraju prošle školske godine priredilo pravu malu oproštajnu prigodu koja je bila sasvim spontana.

Također se uvjerio da profesor Maličević uživa veliki ugled kako u akademskoj zajednici (jer je slušao pohvale drugih profesora prema njemu) tako i kod studenata (koji redovno potražuju zadatke prof. Maličevića jer su im jako dobra osnova za pripremanje ispita iz fizike, na primjer na Elektrotehničkom fakultetu UNSA).

Gđa. Admira Salić-Čano (III6) je iskazala samo riječi pohvale za profesoricu matematike Sofić-Maličević. Također misli da je problem kod odjeljenja III4 nastao zbog nedostatka komunikacije roditelja sa školom i predmetnim nastavnikom.

Gđa. Neira Pešto (III1) je navela da su se prošle školske godine pojavile slične primjedbe na predmetnog nastavnika matematike gđu. Maličević koje su bile u smislu da „prebrzo radi“ i da „preskače redove“ aludirajući da njeno rješavanje zadataka nije bilo dovoljno postupno. Nakon toga je, kaže, profesorica Maličević organizovala dodatnu nastavu za učenike koji je nisu mogli pratiti na zadovoljavajućem nivou na redovnoj nastavi ali, iznenađujuće, na te dodatne časove nije dolazio skoro niko.

Direktorica škole gđa. Amra Čolić je rekla da je upoznata sa navedenim problemom te da je razgovarala sa predmetnim nastavnicima fizike i matematike.

Profesor Maličević joj je, kaže, pokazao pominjani test iz fizike pri čemu joj je naveo da su određena pitanja bila reducirana na puki ispis osnovne formule za određenu oblast fizike bez ikakvih dodatnih izračunavanja, ali da je i pored toga bilo dosta radova bez osvojenih bodova.

Pozvala je roditelje da slijede Protokol komunikacije i saradnje roditelja sa školom i da, prije svega, razgovaraju o ovom problemu kako sa predmetnim nastavnicima tako i sa školom.

Pedagog škole, gđa. Merima Pašalić, je pomenula da su djeca odjeljenja III4 također loše uradila i test iz psihologije (pri čemu su se pravdali da je to zbog testa iz fizike) što je prilično iznenadilo. Rekla je da škola intenzivno radi sa ovim odjeljenjem i da ima osjećaj da je problem dublji. Misli da djeca, izvjesno, imaju nedovoljno razvijene tehnike učenja, da ne rade kontinuirano te da nisu u stanju dovoljno efikasno organizovati svoje vrijeme. Primjetila je da djeca ne prate sadržaj koji im se izlaže niti su pri tome koncentrisani na predmetnog nastavnika.

Poručila je da će škola nastaviti raditi na prevazilaženju problema i sa djecom i sa roditeljima i da roditelji trebaju znati da se imaju kome obratiti u ovoj školi.

#### 4.3.

G. Feriz Bešić (II6) se obratio Vijeću roditelja sa informacijom da stomatološka ordinacija „Dental centar Marković“ (Bulevar Meše Selimovića 17a, Sarajevo) nudi učenicima JU treća gimnazija besplatan pregled.

Samo izvolite!

#### 4.4.

Zamjenica direktorice škole, gđa. Meliha Salihović, obavjestila je Vijeće roditelja o provedenim humanitarnim aktivnostima škole JU Treća gimnazija.

Na inicijativu predsjednice odjeljenja I4, Adne Kadrić, pokrenuta je humanitarna akcija za pomoć Maroku nakon razornog zemljotresa u septembru ove godine. Akcija je vođena posredstvom Društva crvenog križa/krsta BiH. U toku humanitarne akcije je sakupljeno 974,58 KM.

Druga humanitarna akcija je pokrenuta na inicijativu predsjednika Vijeća učenika Treće gimnazije Farisa Čaklovice, za pomoć narodu Palestine u pojasu Gaze.

U ovoj humanitarnoj akciji učestvovala su sva odjeljenja naše škole i sakupljen je iznos od 4.116,6 KM i 91 Euro.

Druga redovna sjednica Vijeća roditelja završena je u 20.15 sati.

Zapisnik sastavio:

g. Izet Turković, sekretar Vijeća roditelja

Zapisnik ovjerila:

gđa. Aida Aganović, predsjednica Vijeća roditelja

---

---